

## Miti Iliyopandwa Kandokando ya Vijito vya Maji

Naye atakuwa kama mti uliopandwa Kandokando ya vijito vya maji, Uzaao matunda yake kwa majira yake, Wala jani lake halinyauki; Na kila alitendalo litafanikiwa—**Zaburi 1:3.**

Hatari huzingira kila njia, na yeye atokaye akiwa mshindi kwa hakika atakuwa na wimbo wa ushindi wa kuimba katika mji wa Mungu. Wengine wana sifa thabiti za tabia ambazo zitahitaji kudhibitiwa kila wakati. Ikiwa zitawekwa chini ya udhibiti wa Roho wa Mungu, tabia hizi zitakuwa baraka; lakini kama sivyo, zitathibitika kuwa laana. Ikiwa wale ambao sasa wanategemea kupata faida kwa umaarufu hawatakuwa makini, watahitaji tu muujiza wa rehema ya Mungu. Ikiwa wanatumainia hekima yao wenyewe, kama watu wengi walio katika hali hiyo wanavyofanya, hekima yao itathibitika kuwa upumbavu. Lakini wakati wanapojisalimisha wenyewe bila ubinafsi chini ya utendaji wa Mungu, bila kukengeuka hata kidogo kutoka kwenye kanuni, Bwana atawanyooshea mkono wa milele na atawapatia msaidizi mwenye nguvu....

Hii ni enzi ya hatari kwa mwanadamu ye yote ambaye ana talanta ambazo zinaweza kuwa za thamani katika kazi ya Mungu; kwa maana Shetani mara kwa mara anaweka majaribu yake juu ya mtu wa namna hiyo, akijaribu daima kumjaza kiburi na tamaa; na wakati ambapo Mungu angemtumia, ni mara nyingi sana kwamba anakuwa huru na kujitosheleza, na kujisikia kuwa na uwezo wa kusimama peke yake....

Maombi na juhudi, juhudi na maombi, vitakuwa shughuli ya maisha yako. Ni lazima uombe kana kwamba ufanisi na sifa zote zinamstahili Mungu, na kufanya kazi kana kwamba ni wajibu wako mwenyewe. Ukitaka nguvu unaweza kuwa nayo; inasubiri uhitaji wako juu yake. Mwamini tu Mungu, Mwamini katika Neno Lake, tenda kwa imani na kisha baraka zitakujia.... Wale walio na moyo mnyenyekevu, wenye matumaini na uliotubu, Mungu anawapokea na kusikiliza maombi yao; na pale Mungu anapowasaidia, vikwazo vyote vitaondolewa.... Baraka ya mbinguni, ipatikanayo kwa maombi ya kila siku, itakuwa kama mkate wa uzima kwa nafsi na itawafanya kukua katika maadili na nguvu ya kiroho, kama vile mti uliopandwa kandokando ya vijito vya maji.